

Runder Tisch Jüdisches Leben Groß-Umstadt

Gedenken an 150 Jahre frühere Synagoge in Groß-Umstadt

Veranstaltung am Sonntag, 26. Mai 2024

1. Station: Informationen am ehemaligen Standort der alten kleinen Synagoge im heutigen Hinterhof des Restaurants „Brücke-Ohl“ – dann Zug mit Musik zur
2. Station: Rund um den Baum Ecke Untere Marktstr. 14 und In der Fahrt: Information von Werner Wendeborg über den ungeeigneten Synagogenplatz
3. Station: Anschließend Gang an den Platz der ehemaligen neuen Synagoge von 1874 vor der heutigen Stadthalle: Informationen, Klezmermusik, Gesang Ps.150

Werner Wendeborg, Pfr.i.R., in der selbst gewählten Rolle als „Nestbeschmutzer“ in seiner Rede an der 2. Station zum problematischen Grundstück der Synagoge:

Guude, ehr Leit,

isch kann ner „Hochhessisch“ – isch hoff, ehr versteiht misch drotzdem.
Isch bin de „Knodder Werner von de Kappesgärde“.

Isch waas net, ob de Umstädder gefällt, wos isch ze verrade habb:
Ehr feiert heid– aach ohne Sinagooch - wie vor hunnertfuffzisch Johrn die nei
Betstubb fer die Judde oigeweiht worn is, „die Neue Synagoge“.

Isch waaß Bescheid. Un isch waas, dess do schun sellemols e poor gonz schaihelische
Leit im Festzuch mitgezochte sin.

Wieso?

Des kann isch aisch schnell verkliggern:

Schon fast fuffzisch Johr vor de Oiweihung da wollt de Damstädter Großherzoch, der
Erste von dene Ludwicks, mehr Reforme und aach mehr „Toleranz“. *(So e Zeusch denke
die sisch immer noch do onwe aus !)*

Ned ner die rischdische Umstädder, also MER *(also „wir“)* Ludderische, solde alle
Vordeile hawwe, sonnern aach die Pälzer, also die Reformierde, unn sogar die Judde, -
un am Schluss dann ja sogar noch die Kodoligge.

Bei de Reformierde hots en Kombromiss gewwe – die solde hald unser schei Kerch
am Maktblatz mitbenuddse - des konnt awwer net long gut gehel!

Un die Judde, des worn so um die fuffzisch, die solde en Bladdz kriege fer e nai
Sinagooch.

Du liewer Godd, wos is do disbuschiert worn...

„En Blatz fer die Judde? – So weid kimmts noch!“,
sou hods am Stammdisch gehaase.

Awwer donn hadde se e schlau Idee:

Do vorn vor de Mauer, net weit weg vom StoibornsDordurm, midde zwische
Mühlbäsch und Stadtgrawe, do muss de Abdegger vun dem kloone Bladdz dord weg.
Do hodds sou gestunke! De Abdegger midd de doode Diern, der solld weirer weg –
dorthie, wo heid de Gruwerhof is.

Priima! „Zwaa Migge mit obner Miggeplatsch!“ Der klaane eklische Bladdz - fer die Judde is des groud guud genug, - wor me sisch do in de Stadt aanisch.

Na ja.

Souen Gestonk, donn noch die Iwwerschwemmunge dord, - niemols hädd isch dord gebaud!

Un die Judde hawwe ja aach noch bald fuffzisch Johr gebraucht, dort ze baue.

In deene John i s zwischedorch der Bladdz aach net besser worn:

Direkt denewe is achtzehnhundertverzisch (1840 uff em grouße Stigg Lond des klaa Kiddche gebaud worn, des „Haftlokal“ (*moi Logal is mer liever!*).

Wos fer en eklische Bladz hadde da die Judde:

wegg vom Stadtlewe, im Schlammbambes zwische zwaa Bäsch, neewem Kiddche, dort, do wo devor die doode Diern un die Reschde von de Abees endsorscht worn sin...

Un donn werds achtzehnhundertsechzisch (1866):

Die Baugenehmischung fer die Sinagooch is do un die Judde sollde endlich baue.

Isch kann mer denge, worum die Judde in Umstd noch e mol 8 John gebraucht hawwe, ehr kloo Sinagooch ze baue, net greißer als e kloo Haisje. Denn en bessern Blads als des DreggsEgg hawwe se halt net gekriecht in Umschd. (*Do haddes die Kaddoligge dann spährer besser mid ehrm Bladz.*)

Un isch bin mer sischer, e pohr vun de Judde hawwe schon sellemols gewissd, dass des en Scheißbladz wor, den mer ehne do fer ehr Sinagooch gewwe hod.

Ned long nach den großartisch Oiweihung hadde se de „Schwamm“ im Mauerwerk, alles vom Grunnwasser. Naa, - „koscher“ wor der Bladdz nie!

Un des hawwe viele Brominende im Festzuch vor hundertunfuffzisch (150) John aach gewisst – vieleischt außer dene 12 Jungfraue. Awwer die hadde aach ner guud auszusehe. Zu saache hadd ellahns die Stadt gehabt.

Wenn er misch fraacht (*also freight*):

Wor do werglich uff dem Bladdz „Die Pforte des Himmels“, wie’s iwwerm Oigong in Sondstaa geschribbe war?

Isch denk: Monscher im Festzuuch sellemols hodd sisch ins Feistsche gelacht un gedenkt: „Die hawwe mer schei noigeleescht, di Judde, mit dem Dreggsbladdz!“

- Bäähh!! –

Wos fer Schaihailische!!

Un heid? Hunnertfuffzisch Johr späärer?

Ehrlisch:

In Ordnung wos net, wie mer in oll dene John mit de Sinagooch umgegonne ist – un schon gornet, wie mer mid de Judde in oll dene John umgegonne is, aach bei uns in Umstd. -- Isch derf dadevuu net oufange – isch reesch misch bloos nehr uff...

Solle se gligglish wern, die jezd uff dem Grunnstigg läwe. Heid erinnerd des koun mehr an die Schand, zuerscht vor hundertneinzisch (190) John, und aach vor hundertfuffzisch (150) John – un aach vor sechsenverzisch John im Juni neinzehnhundertachtunsiebzisch (1978), als mer do des Dach vun de Sinnagooch oischderze gemocht hot...